

**D<sup>a</sup> ROSA-ANA PRADA QUEIPO SECRETARIA DO CONCELLO DE AMES NA PROVINCIA DA CORUÑA**

**CERTIFICO:** QUE O PLENO DESTE CONCELLO LEVOU A CABO SESIÓN ORDINARIA O DÍA 30 DE DECEMBRO DE 2010. DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE

**ACTA DA SESIÓN ORDINARIA LEVADA A CABO POLO PLENO DO CONCELLO O DÍA 30 DE DECEMBRO DE 2010.-**

No Salón de Sesiões da Casa do Concello de Ames, ás vinte horas e trinta minutos (20.30) do xoves 30 de decembro de 2010, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde don **Carlos Antonio Fernández Castro**, e coa asistencia das/os señoras/es concelleiras/os seguintes:

| <b>Grupo municipal socialista</b>   | <b>Grupo municipal Popular</b>   | <b>Grupo municipal do BNG</b>   |
|---|--|---|
| Patricia Conde Lois<br>Carmen Fraga Crespo<br>José Manuel Miñones Conde<br>Gustavo Nieto Santiago<br>José Varela Abeledo<br>Francisco Villaverde Marcos | Santiago V. Amor Barreiro<br>M <sup>a</sup> Dolores Fernández Álvarez<br>Ramón García Argibay<br>Emilio Martínez Carballeira<br>Bernardo Moar Míguez<br>Alfonso Rey López<br>Ana Ruso Valiña | Olalla Alvite del Río<br>José Ramón Arufe Vidal<br>Xosé M. Fernández López<br>Vitor Vicente Díaz<br>Mercedes Vidal Baamonde |

Non asisten pero xustifican a súa ausencia dona Isabel González Cancela e dona Úrsula Seijas Seoane.

Asisten a señora **interventora** dona María del Carmen Castro Louzao e o señor **tesoureiro** don Santiago González Prado.

Actúa como **secretaria** a titular da Corporación dona Rosa-Ana Prada Queipo.

**A) PARA DAR CONTA:**

**Punto Primeiro.- Dar conta dos decretos ditados pola Alcaldía dende a última sesión plenaria ordinaria.**

O señor alcalde informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Informa o señor alcalde que dende o decreto de convocatoria da anterior sesión plenaria ordinaria ate a convocatoria da presente sesión ditáronse un total de 152 decretos, dende o 1398 ata o 1551. Destaca que con respecto ao ano 2009 (que rematou no decreto 1281), rematará o 2010 cun incremento de uns 400 decretos respecto do ano anterior.

**Punto Segundo.- Dar conta do decreto de liquidación do orzamento municipal 2009.**

O señor alcalde informa á Corporación que se ditou o decreto 1496/2010 de aprobación da liquidación do orzamento do ano 2009 e que posteriormente tanto a liquidación como a conta serán sometidas a comisión informativa e ao propio Pleno da corporación.

**B) PARA DELIBERACIÓN E ACORDO:**

**Punto Terceiro.- Aprobación se procede de actas anteriores.**

O señor **alcalde** informa que a secretaria xeral do Concello somete a aprobación do Pleno tres actas, sendo a primeira delas a correspondente á sesión ordinaria de 28 de outubro de 2010.

Toma a palabra o voceiro do grupo municipal do BNG don **Xosé Manuel Fernández López** para dicir que na páxina 42, no punto 29, relativo as mocións, no momento en que

o alcalde lle da a palabra ao señor Villaverde el fixo unha intervención no sentido de se se ía a cambiar o método habitual de presentación de mocións, que era do grupo menor a maior representación, e non se fai ningunha referencia. Intervén a señora **secretaria** para dicir que nalgunha das actas que hai pendentes de aprobar se menciona ese tema pero en concreto nesta acta tería que comprobalo pola gravación, polo cal propón que a acta quede pendente de aprobación.

Continúa o señor **Fernández López** dicindo que aproveita tamén para mencionar que na páxina 54 cre que o que está recollido non se corresponde co que ocorreu. O alcalde dixo que se ía facer un receso e posteriormente levantou a sesión.

Intervén o señor **alcalde** para dicir que a acta queda pendente de aprobación para a seguinte sesión.

**Se somete a consideración a acta da sesión extraordinaria e urxente de 18 de novembro.** Non se producen intervencións con respecto a esta acta, sendo aprobada por unanimidade dos membros presentes da corporación municipal.

Seguidamente sométese a consideración a acta correspondente á sesión de 16 de decembro de 2010. Non se producen intervencións, sendo aprobada por unanimidade dos membros presentes da corporación municipal.

**Punto Cuarto.- Resolución de alegación presentada fronte á aprobación inicial da Ordenanza fiscal reguladora da taxa pola prestación de servizos complementarios educativos e de conciliación da vida familiar e laboral.**

O señor alcalde don **Carlos Antonio Fernández Castro** outorga a palabra á concelleira de Economía e Facenda para facer a presentación deste punto.

Toma a palabra dona **Patricia Conde Lois** para dicir que no pleno ordinario de 28 de outubro aprobouse inicialmente a ordenanza fiscal reguladora da taxa pola prestación de servizos complementarios educativos e de conciliación da vida familiar e laboral. Foi publicada no Boletín Oficial da Provincia e durante o período de exposición pública presentouse unha alegación, que suxire unha mellor redacción do artigo 6. Esta alegación foi examinada polos servizos técnicos, e propónse ao Pleno dar unha nova redacción ao artigo 6.

O señor **alcalde** outorga a palabra ao voceiro do grupo municipal do BNG don **Xosé Manuel Fernández López** que anuncia o seu voto a favor.

Non habendo ningunha outra intervención o asunto dase por suficientemente debatido.

Rematadas as intervencións o pleno da corporación por unanimidade dos membros presentes, adopta os seguintes acordos:

**Primeiro.-** Estimar a alegación presentada por dona XXXXX durante o prazo de exposición pública do acordo de aprobación inicial da Ordenanza fiscal reguladora da taxa pola prestación de servizos complementarios educativos e de conciliación da vida familiar e laboral.

**Segundo.-** Dar unha nova redacción ao artigo 6 da Ordenanza Fiscal reguladora da taxa pola prestación de servizos complementarios educativos e de conciliación da vida familiar e laboral, de xeito que o seu texto definitivo sería o seguinte:

**ARTIGO 6.- DEVENGO**

*A obriga de pagamento para os/as usuarios/as fixos/as nace cando se produza a correspondente formalización da matrícula, con efectos a partires do día solicitado na matrícula como data de inicio do servizo, de acordo co previsto no artigo 24 do Regulamento da Rede Municipal de Comedores Escolares do Concello de Ames, e sen prexuízo de que a data de inicio poida ser variada con posterioridade mediante solicitude do/a usuario/a e coa conformidade do concello atendendo á organización do servizo.*

*Para os/as usuarios/as ocasionais, a obriga de pagamento nace cando se produza a solicitude de utilización do servizo.*

*A obriga de pagamento dos/as usuarios fixos desaparece coa baixa no servizo.*

**Terceiro.-** Aprobar, con carácter definitivo, unha vez resoltas as reclamacións presentadas, a aprobación da Ordenanza fiscal reguladora da taxa pola prestación dos servizos educativos complementarios e de conciliación da vida familiar e laboral.

**Cuarto.-** Publicar dito acordo definitivo e o texto íntegro da Ordenanza fiscal no Boletín Oficial da Provincia e no taboleiro de anuncios do Concello, aplicándose a partires da data que sinala a Ordenanza.

**Quinto.-** Notificar este acordo a quen tivera presentado alegacións durante o período de información pública.

**Sexto.-** Facultar ao Sr. Alcalde-Presidente para todo o relacionado con este asunto.

#### **Punto Quinto.- Aprobación de convenio de colaboración entre o Concello de Ames e o Club de Pensionistas y Jubilados de O Milladoiro (JUPEMI).**

O señor alcalde don **Carlos Antonio Fernández Castro** outorga a palabra á concelleira de Economía e Facenda.

Toma a palabra dona **Patricia Conde Lois** para dicir substancialmente que o concello de Ames ven desenvolvendo dende a Concellaría de Benestar Social e Igualdade unha intensa programación orientada de xeito específico a colectivos como o dos maiores, tanto nos núcleos de Bertamiráns e O Milladoiro coma nas parroquias do rural, destacando a implantación do programa AMESSAN. No Milladoiro constitúíuse o Club de Pensionistas y Jubilados de O Milladoiro (JUPEMI), integrado exclusivamente por maiores e que conta con mais de 300 integrantes. A directiva desta asociación solicitou a este Concello colaboración para o aluguer dun local para desenvolver as súas actividades, que é un local de aproximadamente 200 metros na rúa Figueiras. Tendo en conta o proveito que pode obter o Concello desta asociación de cara ao desenvolvemento das súas propias actividades, propónse a aprobación deste convenio de colaboración que explicita os compromisos das partes. O Concello deberá abonar ao clube a cantidade de 1.200 euros mensuais, con efectos de xaneiro de 2011 e rematando o 31 de decembro de 2012.

O señor **alcalde** abre unha quenda de intervencións. O representante do grupo municipal do BNG don **Xosé Manuel Fernández López** anuncia o seu voto afirmativo.

Toma a palabra o voceiro do grupo municipal popular don **Santiago Amor Barreiro** para dicir substancialmente que esta asociación está a facer un traballo moi importante no Milladoiro e que con esta axuda dende o Concello, poderán subsanar os problemas que tiñan co local no que estaban ata agora.

Rematadas as intervencións o pleno da corporación por unanimidade dos membros presentes, adopta os seguintes acordos:

**Primeiro.-** Prestar aprobación ó convenio de colaboración entre o Concello de Ames e o Club de Pensionistas y Jubilados de O Milladoiro (JUPEMI), cuxa vixencia comezará o 1 de xaneiro de 2011 e rematará o 31 de decembro de 2012.

**Segundo.-** Autorizar o gasto por importe de 28.800 euros con cargo á partida 231.226.99 dos orzamentos 2011/2012.

**Terceiro.-** Facultar ao Sr. Alcalde-Presidente para a sinatura do convenio e para cantas actuacións de trámite sexan precisas para mellor actuación do acordado.

#### **Punto sexto.- Mocións:**

**a. Moción do grupo municipal popular no día internacional para a eliminación da violencia contra as mulleres.**

O señor **alcalde** outorga a palabra ao representante do grupo municipal popular don **Bernardo Moar Míguez** que comeza a súa intervención dando lectura á moción.

O señor **alcalde** abre unha quenda de intervencións, outorgando a palabra á concelleira do grupo municipal do BNG dona **Olalla Alvite del Río**, que anuncia o voto favorable do seu grupo. Co permiso da presidencia toma a palabra o voceiro do grupo municipal socialista don **Francisco Villaverde Marcos** para anunciar tamén o voto favorable do seu grupo.

O señor **alcalde** abre unha segunda quenda de intervencións. Toma a palabra o concelleiro do grupo municipal popular don **Bernardo Moar Míguez** para dicir que quere destacar en primeiro lugar o punto que lles parece mais importante da moción. Cando se fala da Lei orgánica 1/2004, o 1 novembro de 2010 o Partido Popular propuxo que se incluíra aos menores de idade dentro das vítimas directas da violencia machista, presentando unha moción que se debateu no Congreso a finais de novembro, instando ao Goberno do Estado a presentar un proxecto de lei de modificación do artigo 1 da Lei orgánica 1/2004, para incluír aos menores de idade dentro do ámbito de protección da lei. No preámbulo da Lei dise que a situación de violencia contra as mulleres afecta tamén aos menores do entorno familiar, vítimas directas ou indirectas da violencia. O Partido Popular esixía a modificación do artigo 1 para incluír aos menores. Uns 800.000 menores son testemuñas directas e nalgúns casos a violencia de xénero é unha demostración da incidencia que este fenómeno ten nos/as menores e 13 menores no que vai de ano perderon a vida a consecuencia desta violencia. No 40% dos casos o home que maltrata á súa parella tamén utiliza a violencia contra os seus fillos. Na Lei orgánica 1/2004 só se fai referencia á protección de menores no seu preámbulo, pero non se ocupa de elo no articulado porque non se consideran do mesmo nivel que as maltratadas, pero para o PP os menores non son meras testemuñas pasivas. O Goberno ademais de non modificar a Lei para incluír aos menores como vítimas directas eliminou para o próximo exercicio a partida específica de atención especializada aos menores. A Galicia neste ano 2010 correspondéronlle 68.000 €, repartidos cos mesmos criterios que os dos fondos destinados a apoiar ás Comunidades Autónomas en materia de violencia de xénero, criterios de poboación e de incidencia da inmigración, que non son nada favorables a Galicia, en cambio noutros anos manexáronse criterios como o da dispersión poboacional, máis favorables a Galicia, dado que a atención á poboación dispersa ten un custo máis elevado.

A finais de outubro o presidente do Goberno comprometeuse no Congreso a ampliar os instrumentos de protección aos fillos das mulleres afectadas pola violencia de xénero e reiterou o seu compromiso para a eliminación desta lacra social. O PP leva pelexando dende o ano 2004 para que se recoñeza aos menores como vítimas, ao igual que as mulleres, desta violencia, pero por razón ideolóxica o Goberno non quere incorporalos nin facer ningunha modificación da lei a pesar do seu evidente fracaso nestes 6 anos de aplicación. As razóns son ideolóxicas porque a violencia que se exerce polos homes contra as mulleres é unha violencia especial, non como a que se exerce contra os menores, precisamente por ser as mulleres, consideradas polos homes como dependentes deles e como da súa propiedade. O PP non votou a favor da aprobación da Lei 1/2004 precisamente por non incluír aos menores entre os seres a protexer. Os anos viñeron a dar a razón ao Partido Popular, os menores tamén son vítimas e incluso nalgunhas ocasións vítimas preferentes e este ano foi especialmente doloroso, incluso en Galicia un pai foi capaz de prender lume a un coche co fillo dentro so para facer dano á súa ex parella, e o neno foi a vítima.

Rematadas as intervencións o pleno da corporación, por unanimidade dos membros presentes, presta aprobación á moción do teor literal seguinte:

#### *Exposición de motivos*

*Neste ano de 2010, que está a piques de rematar, o fenómeno da violencia contra as mulleres por parte das súas parellas ou ex parellas ten dado mostras evidentes de que aínda que existe un elevado grao de concienciación e rexeitamento da sociedade no seu conxunto contra esta clara manifestación de desigualdade e discriminación contra as*

*mulleres, é moito o que temos por facer aínda para conseguir unha sociedade sen violencia.*

*Os casos máis graves que temos vivido ata esta data evidencian como esa violencia ten como vítimas preferentes ás mulleres, pero afecta de xeito moi importante aos nenos e nenas, que son tamén vítimas ou testemuñas da violencia, con importantísimas secuelas para o seu desenvolvemento físico e psicolóxico.*

*A violencia de xénero só se pode erradicar desde a concienciación e a sensibilización de toda a sociedade, así como desde a educación das xeracións máis novas nos valores da igualdade, a paz, a tolerancia e o rexeitamento da violencia.*

*Galicia conta cunha lei propia, a 11/2007, para traballar de xeito máis eficaz na eliminación desta lacra da nosa sociedade, e na que se articulan medidas para que a coordinación entre as diferentes administracións se reforce na procura de respostas áxiles e axeitadas.*

*Os concellos teñen un importante papel de prevención e atención ás vítimas e por elo a súa implicación na resposta eficaz aos casos que se presenten nos seus límites é absolutamente necesaria.*

*Por todo elo, o grupo do Partido Popular no concello de Ames eleva ao pleno a adopción dos seguintes acordos:*

*1.Rexeitar calquera tipo de violencia que se exerza contra as mulleres, e moi particularmente a violencia que se exerce contra as mulleres no seo das parellas.*

*2.Solicitar ao goberno da Xunta de Galicia que impulse todas as medidas precisas para erradicar este fenómeno, particularmente aquelas contidas na lei galega 11/2007.*

*3.Solicitar á administración local, que facilite ao máximo o acceso das mulleres aos recursos existentes, reforzando actuacións ou poñendo en marcha mesas de coordinación a nivel local e protocolos de actuación ante os novos casos.*

*4.Solicitar ao goberno de España que estenda a protección da lei orgánica 1/2004 de medidas de protección integral contra a violencia de xénero, aos e ás menores, por entender que son vítimas, directas ou indirectas, da violencia que se exerce sobre as súas nais, dotando orzamentariamente esta importante modificación de xeito adecuado e suficiente.*

*5.Solicitar ás administracións estatal e autonómica que continúen velando porque os medios de comunicación adopten as medidas oportunas para que o tratamento informativo da violencia contra as mulleres se manteña no respecto ás vítimas e ao seu contorno.*

Toma a palabra o señor alcalde don **Carlos Antonio Fernández Castro** para dicir que os dous textos presentados como mocións de urxencia pola concelleira do grupo municipal do BNG dona Olalla Alvite del Río non son considerados como mocións pola Alcaldía, dado que son copia literal dos que xa presentara polo rexistro de entrada do Concello o día 20 de decembro, que foron contestados o día 21 de decembro por esta Alcaldía. Na contestación se lle dicía con toda claridade que os dous textos, un deles relativo á seguridade e control dos alumnos de infantil antes da entrada aos centros escolares e outro relativo á cesión á Consellería de Educación dunha parcela para a construción dun CEIP no núcleo do Milladoiro, unha vez examinado o contido de ámbolos dous escritos e as súas propostas de acordo, motivan a súa cualificación coma rogo e non como moción, polo que se lle informa que non serán incluídos como mocións nesta sesión plenaria de 30 de decembro pero poderá presentalos como rogos.

Remata dicindo que queda claro que non se cercena ningún dereito, porque estes asuntos poden ser tratados neste Pleno como rogos, tendo en conta que o rogo é a formulación dunha proposta de actuación dirixida a algún dos órganos de goberno municipal.

## **Punto sétimo.- Rogos e Preguntas.**

### **Rogos.**

Intervén co permiso da Presidencia polo grupo municipal do BNG dona **Olalla Alvite del Río**.

**Primeiro rogo.-** O primeiro é ao grupo de goberno e á Alcaldía que teñan a ben facer as xestións urbanísticas que consideren necesarias para o antes posible propoñer a este Pleno unha parcela axeitada para a cesión á Consellería de Educación para a construción dun CEIP no núcleo do Milladoiro. Unha parcela destas características de 12.000 m2 foi requirida a este Concello no mes de febreiro. En xuño houbo unha reunión por iniciativa do grupo municipal do BNG entre todos os grupos políticos con representación no Pleno e diversas entidades asociativas do Milladoiro e a Alcaldía comprometeuse a convocar unha Xunta de Portavoces para ver que posibilidades había de ofertar á Consellería de Educación unha parcela. Estamos en decembro e seguimos á espera. Naquela xuntanza o señor alcalde anunciou que o Concello contaba con diversas posibilidades das que non estamos ao tanto.

**Segundo rogo.-** Vai dirixido tamén ao grupo de goberno e ao alcalde de que teña a ben estudar que as denominadas “patrullas escolares” que veñen a desenvolver tarefas de vixilancia do tráfico e da seguridade vial no momento de entrada aos centros escolares, pasaran a desempeñar a tarefa de control do alumnado nos momentos previos a entrar, sobre todo dos nenos de 4 e 5 anos, motivado pola preocupación dos pais do centro “A Maía”, e que a parella da Policía Local que normalmente se despraza a estes centros nos momentos de entrada leve a cabo eses traballos de control do tráfico e seguridade viaria.

Toma a palabra con permiso da presidencia o concelleiro do grupo municipal do BNG don **Vítor Vicente Díaz**.

**Terceiro rogo.-** Vai dirixido ao concelleiro de Patrimonio, recordando un rogo anterior no que solicitaba que se arranxase o muíño que está a carón da autovía e que foi totalmente rehabilitado, pero actualmente atópase co tellado bastante deteriorado debido aos temporais. Rogo que se amañen estes deterioros.

**Cuarto rogo.-** Vai dirixido ao alcalde ou ao concelleiro de obras, respecto ao novo parking temporal que se habilitou na Avda. da Peregrina, para solicitarlle que se sinalice o parking e que estuden a posibilidade de colocar bolardos ou algún elemento físico que impida que os vehículos atravesen as beirarrúas, co consecuente deterioro e perigo para a xente.

Toma a palabra con permiso da presidencia o concelleiro do grupo municipal popular don **Bernardo Moar Míguez**.

**Quinto rogo.-** Rogo, tal e como dixen hai tempo, que se limpen as beiravías que van do Santo á Tarroeira, que o ano pasado cando veu a época de augas trouxo problemas a algún veciño tirando algún valado.

**Sexto rogo.-** Rogo á Policía Local que exerza maior vixilancia nas paradas de bus escolar, xa que os coches crean certo perigo á hora de subir e baixar os cativos.

**Sétimo rogo.-** Rogo que se cree unha parada de autobús na rúa Castelao, xa que cada vez que chega o autobús e descarga os pasaxeiros colapsa o tráfico.

**Oitavo rogo.-** Rogo que se repare de novo unha focha na rúa Viorneira, que se reparou hai uns meses pero que se está volvendo a fundir.

**Noveno rogo.-** Rogo que se pinten as raias laterais na estrada de Buceleiras hacia Biduido.

**Décimo rogo.-** Rogo que se instalen bandas rugosas no paso de cebra da rúa Agro do Medio, que é bastante perigoso, sobre todo agora que se vai a facer alí un parque infantil.

Toma a palabra con permiso da presidencia o concelleiro do grupo municipal popular don **Emilio Martínez Carballeira**.

**Décimo primeiro rogo.-** Rogo que se arranxen as beirarrúas deterioradas en distintas rúas de Bertamiráns, que supoñen un perigo.

**Décimo segundo rogo.-** Rogar que hai dúas farolas no monte de Lapido que levan dous meses sen repoñerse e están cos cables á vista na beira da rúa.

**Décimo terceiro rogo.-** No paseo fluvial unha das pontes de madeira ten as táboas completamente podridas, o que supón un perigo. Rogo que se arranxen.

**Décimo cuarto rogo.-** Na praza de Chavián onde está cuberto de madeira cada vez está máis abandonado, púxose un toldo pero agora en algunha zona non hai nin toldo nin táboas nin nada. Rogo que se arranxen.

**Décimo quinto rogo.-** Hai colectores de lixo que seguen estorbando á hora de incorporarse á estrada principal. Rogo que se arranxen.

**Décimo sexto rogo.-** O alumeado do campo de fútbol onde xoga o Bertamiráns é insuficiente, había que amplialo e potencialo. Rogo que se arranxen.

Toma a palabra con permiso da presidencia a concelleira do grupo municipal popular dona **María Dolores Fernández Álvarez**.

**Décimo sétimo rogo.-** Cualificar de lamentable o acceso ás vivendas e garaxes do núm. 5 da Travesía do Pedregal, consecuencia dunhas obras que están causando problemas aos veciños, coa ruptura incluso dunha tubaría do gas, rogo que se repoñan as beirarrúas canto antes.

**Décimo oitavo rogo.-** A beirarrúa que está diante do Gadis, na Avda. da Maía, é un perigo para os usuarios do supermercado e para os outros viandantes. Houbo varias caídas por culpa da cuña que se adentra demasiado na beirarrúa. Rogaría que se estudase unha mellor ubicación ou a colocación dalgún elemento que a faga máis segura.

Toma a palabra co permiso da presidencia o concelleiro de Servizos Básicos, Parques e Xardíns don **Gustavo Nieto Santiago**, en referencia aos rogos do señor Emilio Martínez Carballeira, dicindo que estes días estase reparando a madeira da praza de Chavián, repoñendo a parte da pérgola que faltaba. A ruptura das farolas do monte de Lapido foi por sendos accidentes de coche, xa se están tramitando os expedientes e hai unha empresa encargada de repoñelas e pasar as facturas aos seguros dos vehículos.

Toma a palabra co permiso da presidencia o concelleiro de Cultura, Deportes e Patrimonio Histórico don **Francisco Villaverde Marcos** para repostar que con respecto ao alumeado do campo de fútbol houbo que modificar o proxecto presentado, que ten unha subvención da Deputación Provincial da Coruña e que en canto o aprobe a Deputación se fará a obra.

Toma a palabra o señor **alcalde** para dicir que non ten inconveniente en repostar algún dos rogos.

En primeiro lugar, polo que respecta á cesión dunha parcela á Consellería de Educación para a construción dun CEIP no Milladoiro, di que teñen moi avanzadas conversas coa Consellería de Educación. Que hai que ter en conta que as competencias de educación no marco xurídico actual son de carácter económico, colaborando os Concellos cando é posible coa entrega de parcelas ou cando isto non é posible ou é difícil, con outras formas de cooperación ou colaboración. A última conversa co Conselleiro de Educación e co Secretario Xeral da Consellería foi esta mesma semana e estamos en conversas para buscar unha solución axeitada para dispoñer dunha parcela duns 12.000 m<sup>2</sup> para construír un CEIP no Milladoiro. Nada nos satisfaría máis que chegar a un acordo e levar a cabo este proxecto, que de acordo co mapa escolar que temos elaborado en base a un estudio da Universidade de Santiago de Compostela, está fora de toda dúbida a necesidade e conveniencia da construción deste centro de ensino infantil e primario. En canto teñamos mais avanzado o traballo coa Consellería de Educación informaremos a este Pleno e se o consideramos adecuado convocaremos unha Xunta de Voceiros e as reunións que se consideren necesarias.

Con respecto á seguridade e control dos alumnos de infantil na entrada aos centros escolares, dicir que non podemos considerar o rogo para que as que se chaman

“patrullas escolares” desempeñen as tarefas de condución dos alumnos de infantil dende a cancela do recinto escolar ata a aula. Esas patrullas escolares implantáronse para regular de forma directa, continuada e permanente o paso de peóns, e en conxunto o acceso ao centro nas mellores condicións de seguridade para os 625 alumnos/as dese centro. O abandono pola patrulla escolar do tráfico do paso de peóns suporía incrementar o perigo para o conxunto dos nenos/as do centro, e non temos a garantía plena de que poda estar continuamente alí unha patrulla da Policía Local. Estas patrullas naceron porque a Policía Local frecuentemente pode estar alí pero non está garantida a súa permanencia total, debido a que calquera accidente ou incidente de seguridade vial ou seguridade cidadá require a presenza do corpo policial.

Plantéxanos que saquemos a patrulla escolar do paso de peóns e da vía pública onde hai problemas de seguridade vial, a proba é que o ano pasado houbo unha persoa que desatendendo ás indicacións da patrulla escolar cunha moto provocou un risco importante de accidente, se non estivera a patrulla escolar sería moito peor. Polo tanto, non é lóxico nin razoable retirar unha patrulla que foi creada para algo específico, cando aínda por riba o Concello non ten competencia na materia de adentrar aos nenos/as de infantil dende a cancela do recinto escolar cara a aula. Que o fixéramos asumindo voluntariamente esa competencia no caso dos nenos de tres anos non quere dicir que sexa unha competencia outorgada e adxudicada, e non quere dicir que haxa que xeneralizalo con outros alumnos/as, tendo en conta ademais que na medida que os Concellos vamos cubrindo déficits de outras administracións, estas abandonan as súas competencias. Para achegar aos nenos/as á cancela do colexio están os acompañantes do autobús. Levar os nenos/as dende a cancela ata a porta da súa aula, é unha misión que tal e como se fixo saber á ANPA, corresponde á persoal da Consellería de Educación, que pode decidir que os vixiantes dos autobuses atravesen a cancela e os leven ata a porta da aula, ou decidir que o profesorado que ten uns 10 minutos de obriga de custodia se encargue desa misión. O Concello non vai a ser quen decida se ese traxecto ata a aula o debe facer o persoal de acompañamento dos autobuses ou o profesorado do centro, pero tampouco nos corresponde facer ese acompañamento dentro do recinto escolar. Aínda tendo de inicio esta crenza, alegrounos moito saber que a Consellería de Educación respecto do coidado de menores solicitou un informe da súa propia asesoría xurídica e remitiuno aos centros escolares recordándolles que os alumnos son da súa responsabilidade dende que chegan ao centro, concluíndose no informe que sería axustado a dereito que os regulamentos de réxime interno dos centros fixen un horario de apertura dez minutos antes de iniciar as clases para recibir aos nenos de infantil e primaria que chegan no transporte escolar así como o establecemento de quendas para que todo o profesorado coide do alumnado nese lapso de tempo. Vese claramente que non é competencia municipal. O informe inclúe varios extractos de sentenzas nas que se considera responsable ao centro educativo dos incidentes que poidan sufrir os alumnos neses minutos antes e despois de saír da clase, considerándose lóxico que este horario non lectivo se recolla nos regulamentos de réxime interno e na programación anual do centro.

O Concello barallou a posibilidade de ampliar ese pequeno servizo ao resto dos alumnos de infantil, pero ademais de que tiñamos que alterar os nosos propios servizos, implicándonos economicamente nunha responsabilidade que non nos compete, todos os consellos que recibimos foron de que non deberíamos asumir novas responsabilidades nesa materia senón que deberíamos deixar de exercer a axuda que víñamos facendo porque este informe e as sentenzas indican que os centros son responsables dentro do recinto e non os Concellos, e poderíamos estar excedéndonos das competencias propias e invadindo competencias dos centros educativos. Polo tanto, a ese rogo xa lle contesto con claridade cal é a postura do Goberno avalada polo ditame da Consellería e en todo caso aínda que estivéramos dispostos a buscar algunha solución, non sería a de retirar a patrulla escolar do paso de peóns, porque non temos a garantía de que a Policía Local poda estar continuamente alí regulando o tráfico.

Toma a palabra co permiso da presidencia a concelleira do BNG dona **Olalla Alvite del Río**, para dicir que segundo di o alcalde as patrullas escolares se crearon para regular o paso de peóns cando en 2004 había 10 policía locais e non 25. Di non saber se é



competencia municipal regular todos os pasos de peóns e que pode ser discutible a competencia do Concello para crear estas patrullas escolares. O que se intenta é dar unha resposta a un problema e a unha preocupación dos pais. Non fala de eliminar as patrullas na entrada aos centros escolares nin eliminar a seguridade vial nos pasos de peóns, senón que o faga a Policía Local, que é a súa competencia.

Toma a palabra o señor **alcalde** para dicir que son outras Administracións as que teñen competencias e as teñen que exercer. Ao mellor cando imos facer os lúdicos neses centros non temos as mesmas facilidades e temos que ir a facelas ao IES porque no CEIP non é tan doado. En primeiro lugar, no interior do recinto escolar non é competencia municipal e nin sequera é discutible porque a propia Consellería competente na materia recoñece que a competencia é dos seus empregados, e en segundo lugar a seguridade peonil e viaria, nas vías do ámbito municipal, especialmente no casco urbano, si está nas mans dos Concellos. Se eu tivera a seguridade de que no 100% das xornadas escolares a Policía Local podía estar nese centro suprimiríamos as patrullas escolares, pero isto non sempre é posible porque a Policía ás veces ten que marchar a facer outras competencias que si son do instituto armado, mentres que a regulación no paso de peóns non ten que ser obrigatoriamente atendida polo corpo armado da Policía Local, pode ser regulada por auxiliares da Policía Local.

Continúa o señor **alcalde** dicindo que toman nota dos rogos aos concelleiros, e que con respecto ao novo parking está aínda incompleto na súa dotación, pero había que resolver unha parte da obra que tiña unha subvención de mellora das áreas comerciais da Consellería de Economía e Industria antes do día 20 de decembro. Queda algo mais por facer pero estes días as empresas construtoras teñen calendario vacacional por convenio, polo que se optou que se puidera utilizar o aparcamento aínda que non estivera totalmente completado. Faltan elementos de sinalización, elementos de alumbeado e mesmo o parking estaba balado para non utilizalo e o propio día de Noiteboa á vista da necesidade de utilizalo pola gran afluencia de xente, parecía ridículo non deixar utilizalo porque faltasen elementos de sinalización.

Di tamén tomar nota desa maior vixilancia para o bus escolar. Di que se reciben uns 40 correos electrónicos semanais na Alcaldía, e algúns tocan cuestións vinculadas coa Policía Local e para que todos os membros da Policía Local sexan conscientes das cuestións que plantexa a cidadanía e teñan constancia de como nos perciben os cidadáns, temos un modelo de comunicación que se titula “Así nos ven”. Nalgunhas ocasións transcribimoslles queixas ou comentarios dos cidadáns que non temos porque compartir, e dentro desas comunicacións plantexarémolle o seu rogo de maior vixilancia do bus escolar e mesmo ao departamento de regulación do tráfico plantexarémolle ese rogo dunha nova parada de autobús na rúa Castela.

Continúa en relación ao rogo de reparación da rúa Viorneira, dicindo que o día 10 de xaneiro está previsto que comecen unhas obras nesa rúa de eliminación da beirarrúa que tapona hacia a Nacional 550. Tardamos moitísimo tempo en conseguir do Ministerio de Fomento a autorización para poder eliminar ese tramo de beirarrúa permitindo a permeabilidade de vehículos hacia a rúa Viorneira, que agora mesmo ten un único sentido de circulación pero non ten saída e nesa rúa hai varios establecementos e mesmo está a Garda Civil. Consequimos do Ministerio de Fomento esa autorización coa condición de que non a utilizemos de acceso á N-550 senón á inversa, de abandono da N-550. Evidentemente calquera focha que haxa na rúa será reparada.

Co permiso da presidencia intervén o concelleiro do grupo municipal popular don **Bernardo Moar Míguez** para dicir que non quere criticar o traballo da Policía Local e por outra parte co obxecto de situar mellor a focha da rúa Viorneira indicar que se atopa na entrada da rúa.

Continúa o señor **alcalde** dicindo en relación ao rogo do señor Martínez Carballeira de arranxo das beirarrúas de Bertamiráns, que tanto en Bertamiráns como no Milladoiro repáranse periodicamente as baldosas das beirarrúas que se atopan soltas, que é frecuente velas marcadas cun spray fosforescente para que unha brigada vaia detrás arranxándoas. Especialmente en Bertamiráns hai aliñacións oficiais do PXOM que

delimitan a beirarrúa pública e o retranqueo que corresponde aos edificios, neses casos o Concello non o arranxa senón que comunica á Comunidade de propietarios a súa obriga de facelo. En concreto houbo unha comunicación moi persistente no inicio da rúa do Pedregal onde o retranqueo, propiedade da Comunidade de Propietarios estaba sen arranxar.

Continúa dicindo que con respecto ás farolas de Lapidó xa contestou o sr. Nieto, que cando son obxecto dun accidente hai que reclamar o importe da reparación as compañías de seguros dos vehículos. Con respecto ao paseo fluvial e á praza de Chavián manifesta que serán obxecto de revisión detallada, resaltando que na praza de Chavián xa se arranxaron varias cousas, tamén por unha cuestión de oportunidade, o día 5 a Cabalgata de Reis remata nese escenario, polo que hai que telo en boas condicións, ao igual que a praza Manuel Murguía.

Con respecto ao campo de fútbol xa contestou o sr. Villaverde. Hai unha subvención concedida pola Deputación para ampliación e mellora do alumeado do campo de fútbol, de cara a conseguir un estadio municipal en Ames, o segundo será o do Milladoiro.

Continúa dicindo que toman nota das cuestións plantexadas pola sra. Fernández. Con respecto á rampla de acceso ao Gadis di que dende que é alcalde está preocupado por esa rampla e que enviou unha providencia da Alcaldía aos servizos técnicos de Urbanismo a pouco de comezar o seu mandato, pero que cree recordar que esa rampla está precisamente na aliñación privada do edificio e non na parte da beirarrúa pública, segundo figura no PXOM, e ese é o motivo que impediu ao Concello actuar neste caso. Aínda que se compromete a volver sobre o asunto mirando a posibilidade de obrigar aos propietarios do supermercado a poñer unha barandilla ou algún outro elemento que obrigue aos viandantes a fixarse mais.

#### **Preguntas.-**

Intervén o concelleiro do grupo municipal do BNG don **Xosé Manuel Fernández López** para facer as seguintes preguntas:

**Primeira pregunta.-** Con respecto ao parque recreativo do Milladoiro e a Travesía do Porto, no mes de abril deste ano produciuse un acordo entre o grupo municipal do BNG e o grupo municipal socialista para a aprobación do orzamento municipal do 2010, entre outros acordos dous eran referentes ao parque recreativo do Milladoiro e a Travesía do Porto. Estes acordos tiveron reflexo orzamentario que é o que nos interesa neste caso porque polo que se refire ao acordo político non é o Pleno o espazo pertinente. Con respecto ao parque recreativo do Milladoiro recóllese no orzamento unha partida de 818.147 euros que se financiaría con venda de patrimonio municipal do solo, no acordo político había un prazo que en todo caso será o partido socialista o que noutro ámbito deberá explicar. Con respecto á Travesía do Porto refléxase tamén no orzamento unha cantidade de 2.402.883 euros e tamén había un prazo estimado para iniciar as obras. Na medida en que son dous proxectos longamente demandados polos veciños do Milladoiro, que hai un compromiso adquirido polo goberno reflexado nun documento orzamentario e que proximamente remata o ano e polo tanto a vixencia dos actuais orzamentos as miñas preguntas van dirixidas no sentido de que iniciativas se tomaron para executar estes dous proxectos e cando se ten previsto licitar ou como van quedar estas dúas obras a partir de xaneiro do ano que ven.

**Segunda pregunta.-** Vai relacionada co centro socio-cultural de Ortoño, que tamén estaba nese acordo entre os dous grupos políticos e ten reflexo orzamentario. No orzamento recóllese unha partida de 338.218 euros destinada a este equipamento. É un equipamento longamente demandado polos veciños e comprometido e a día de hoxe que saibamos tampouco se iniciaron trámites de aprobación do proxecto nin de licitación. ¿Por que non se aprobou o proxecto, por que non se licitou a obra e cando se ten previsto aprobar o proxecto e licitar a obra?

Intervén o voceiro do grupo municipal popular don **Alfonso Rey López**.

**Terceira pregunta.-** Cando fago preguntas, cando temos a sorte de chegar a este apartado, declaro antes de nada a intención coa que as fago, hoxe vou facer varias preguntas sobre un tema que descoñezo totalmente, por iso o fago, para aprender, deste xeito quero evitar o triste trance aos concelleiros do grupo de goberno de terme que insultar despois dicindo que non sei nada, xa me declaro eu non coñecedor do tema.

A cuestión é a seguinte: con data 16 de outubro 2009 e por decreto da Alcaldía núm. 974/2009 dítase unha orde pola que se paralizan obras que se estaban a executar consistentes na construción dun galpón no lugar de Leboráns, parroquia de Trasmonte, por parte dunha veciña, sen contar coa correspondente licenza de obras municipal. Con data 16 de xuño de 2010, a Xunta de Goberno Local acorda conceder a licenza municipal para a construción dese galpón solicitado por esa veciña, que se dicía que era para garda de útiles de labranza, pero dise que é no lugar de Raíces, Biduído. Supoñemos que é un erro que se debeu xa subsanar e entendo que se refire ao mesmo galpón de Leboráns. Debemos entender que hai un erro na localización pois parece que o que se fai é rectificar a orde do decreto 974/2009 polo que se paralizaban as obras nese galpón. ¿Que foi o que se modificou para que se permita continuar as obras? Eu atópome cos seguintes datos: o decreto 974/2009 di que, ollado o informe da Policía Local do Concello por mor das obras que se están a executar no lugar de Leboráns, parroquia de Trasmonte, consistentes na construción dun galpón de bloques de formigón o arquitecto técnico municipal emite un informe o 16 de outubro de 2009 do teor seguinte: As obras realizadas de peche fixéronse nun solo clasificado e cualificado como solo de núcleo rural tradicional. Ten solicitada licenza de galpón en data 22 de setembro de 2009 R.E. núm. 18.070, non contando aínda coa licenza correspondente. De acordo coas fotografías que aporta a Policía Local estase a proceder á construción do galpón sen recuarse do camiño público, subliño camiño público, cousa que deberá facerse de acordo co que sinala o PXOM e a LOUGA que como mínimo esixe unha distancia de 4 metros medidos dende o eixo do camiño. Tendo en conta o plano catastral da parcela e do que se aprecia na fotografía, a superficie que se constrúe é maior dos 40 metros solicitados, o que incumpré a normativa, ao tratarse dunha obra maior e non presentar o necesario proxecto técnico. A continuación veñen as consideracións legais e por último o señor alcalde resolve: Primeiro. A paralización inmediata das obras de construción dun galpón que se está a executar no lugar de Leboráns, parroquia de Trasmonte, por unha veciña. Segundo.- Incoar expediente. Terceiro.- Dar traslado, notificar as medidas, conceder trámite de audiencia, etc.

Pero a pesares do informe e da resolución logo cámbiase de criterio e concédese a licenza sen que se resolvesen as deficiencias que se apuntaban no informe da Policía Local e así no decreto 908/2010, no apartado terceiro dise: a Xunta de Goberno Local celebrada o 30 de xuño de 2010 acorda conceder a licenza de obra, a solicitada por esta veciña con enderezo no lugar de Leboráns, parroquia de Trasmonte, para a construción dun galpón de 25 m<sup>2</sup> para uso de garda de útiles de labranza no lugar de Leboráns, parroquia de Trasmonte. Pero resulta que no testamento outorgado por dona XXXXXX fálase de camiño de carro e camiño peonil sen que se especifique se é público ou privado. A solicitante declara que a superficie a construír vai ser de 40 m<sup>2</sup>, noutros casos declaraba 37 e no principio como acabamos de ver 25, cando en realidade constrúe practicamente toda a superficie da finca, que é de 74 m<sup>2</sup>. Como proba de que o camiño cualificado nun documento notarial como de carro ou peonil é privado e non público apórtase unha declaración firmada por 14 veciños, que en todo caso non debe prevalecer sobre o documento notarial. Nun documento do Concello sobre condicións dos cerramentos dise no artigo 15, apartado 2, subapartado camiños de carro: os cerramentos poderán efectuarse a 1,5 metros do seu borde, por certo, isto foi o que fixo un veciño que estremaba coa solicitante na súa parcela; con respecto aos camiños peonís di: os cerramentos efectuaranse a un metro do borde. Esta é a situación sen alargar máis a exposición. Ante estes feitos ¿para que se levantou a paralización se non se cumprían as esixencias legais? ¿Por que se cambiou a denominación do camiño? ¿Por que non se obrigou a recuar, segundo di a Lei? ¿Comprobouse se os metros construídos eran os que se dicían na solicitude de obra?

Intervén o voceiro do grupo municipal popular don **Bernardo Moar Míguez.**

**Cuarta pregunta.-** ¿É responsable o grupo de goberno da eliminación da leira-parking que había situada na esquina entre as rúas Agro do Medio e Pardiñeiros?

Intervén o señor **alcalde** para contestar a esta pregunta, dado que segundo manifesta o señor Moar Míguez ten máis preguntas encadeadas con esta. Di que non lle consta que como Concello fixéramos ningunha actuación nin para autorizar, porque ese é un solar que ten unha grúa – pluma desmontada e unha caseta de obra. Nin autorizamos que a xente pasara pola beirarrúa, nin que eu saiba agora mesmo o eliminamos, pero puido ir a Policía Local dentro das súas actuacións ordinarias e dicirlles algo, pero eu non recordo ter asinado ningún documento requirindo oficialmente nada.

Intervén o voceiro do grupo municipal popular don **Emilio Martínez Carballeira**.

**Quinta pregunta.-** En relación á Gala do deporte, estando totalmente de acordo con todos os diplomas que foron entregados tanto aos deportistas como a toda a xente vinculada ao deporte do Concello de Ames, o que realmente me chamou a atención foi que non se tivera en conta ao Bertamiráns despois de ser campión en distintas categorías infantís, haber ascendido, e facer o papel que está facendo na liga na que está. ¿Realmente tiveron en conta ao Bertamiráns para outorgarlle un dos diplomas?

**Sexta pregunta.-** En relación a eses asesores dos que tanto falou vostede da Universidade, do servizo que prestaron a este Concello, o que me gustaría saber é canto lle supón ao Concello de Ames estes servizos e se ao día de hoxe están ao día nos seus cobros.

Intervén o voceiro do grupo municipal popular don **Santiago Amor Barreiro**.

**Sétima pregunta.-** Xa se fixo un rogo sobre isto neste Pleno e quería saber se ten pensado mellorar o firme da parcela que se atopa detrás da cafetería Plaza, que ten entrada pola rúa Alcalde Lorenzo e que da servizo a moitos vehículos en Bertamiráns.

**Oitava pregunta.-** Quería saber se me poden responder cal é o motivo polo que non se pagou o pasado mes de novembro o plus de festivos e de nocturnidade á Policía Local.

**Novena pregunta.-** Quería saber se nos vai a dar traslado, unha vez que requiriu aos departamentos, creo que ao de Contratación, deses informes sobre aquel servizo que contratou o Concello de impartición de actividades no campamento de Cudillero (Asturias).

**Décima pregunta.-** A última pregunta é a raíz dunha información que vostede deu neste Pleno esta mesma noite, relacionada con esa reunión que tivo co conselleiro de Educación e co secretario xeral, saber se nesa reunión plantexou ou fixo chegar algunha proposta concreta para solventar esa solicitude que fixo a Xunta de Galicia o pasado 22 de febreiro para un novo colexio no Milladoiro, quería saber se había algunha proposta de terreo concreto.

Toma a palabra o señor alcalde don **Carlos A. Fernández Castro** para dicir que rematada a quenda de preguntas vai a dar resposta a elas na medida en que é posible facelo de viva voz no mesmo Pleno.

En primeiro lugar, con respecto á pregunta do señor Fernández López sobre a Travesía do Porto, dicirlle que o goberno ten total e absoluto interese en poder licitar canto antes esta obra, de feito hai unha subvención da Deputación da Coruña, cree recordar que de 400.000 euros, para asegurar a cota que ten que poñer o Concello (cree recordar que de 550.000 euros en total, 400.000 ponos a Deputación e 150.000 o Concello), o resto correspóndelle a propietarios colindantes coa zona. É longo de explicar, pero teñen vostedes a posibilidade de acceder ao expediente.

Despois de que na Xunta de Goberno Local se acordara unha distribución dos custes proporcional a cada propietario notificóuselle a cada un e así de memoria, algúns deles recorreron. Primeiro non estaban conformes coas contías, dicían que debíamos de licitar e despois repartir esas contías, algúns deles recorreron máis ao fondo non estando de acordo con ter que poñer o diñeiro. Hai unha semana tivemos unha xuntanza de técnicos no Concello para intentar limar todos eses problemas e atrancos burocráticos, administrativos e legais para poder licitar a obra da Travesía do Porto. Eu confío en que

resolvamos eses atrancos o máis rapidamente posible e podamos licitar esa obra que para nos é fundamental. É máis, eu nesa reunión cos técnicos municipais fixen unha afirmación moi contundente: se hai un inconveniente moi forte, moi serio, para poder licitar a obra estou disposto a acometer un traballo de aglomerado asfáltico enriba do pavimento actual da Travesía do Porto e convertela cando menos en transitable con mellores condicións das que ten agora mesmo, porque o paso do tempo vaina deteriorar. En calquera caso eu estimo que ao regreso das vacacións da arquitecta municipal, á que lle encargamos un informe ese mesmo día (a reunión prodúcese sobre o día 7 ou 8) podamos resolver dunha vez a posible licitación desta obra. Non é falta de vontade en absoluto, tiñamos a lexítima ilusión de poder chegar ao final deste mandato con esa obra feita, iso non vai ser posible, pero polo menos chegar ao momento da rendición de contas diante da cidadanía co proceso o máis avanzado posible, se puidera ser coa licitación feita, coa adxudicación feita e coa obra iniciada. Todo o que vaia para atrás diso para nos non é prato de bo gusto porque somos o goberno deste Concello e querémolo levar adiante. Polo tanto non lle quepa a vostede a máis mínima dúbida de que temos moitísimo interese en sacar isto adiante. Tamén é verdade que é un tema moi enrevesado precisamente polo modelo de xestión que está establecido no sentido de que os propietarios colindantes teñan que poñer o diñeiro. Eu ata lin na prensa hai uns días que uns dos propietarios colindantes dos mais importantes cualitativa e cuantitativamente falando daba conta nun medio de comunicación de que xa puxeran un millón e medio de euros ou non sei canto para a urbanización da Travesía do Porto cando nas contas do Concello desde logo ese diñeiro non está ingresado. Vamos a intentar resolvelo coa maior celeridade posible e co maior ánimo posible.

Con respecto ao centro socio-cultural de Ortoño encargouse o proxecto básico e de execución. O día 10 de decembro o arquitecto encargado de elaborar o proxecto comunicounos que por parte del o proxecto está rematado, polo tanto arquitectonicamente o proxecto básico e de execución está listo, pero falta que o Colexio de xeólogos vise o estudio xeotécnico, e así como nos colexios de arquitectos non temos moito problema e en poucos días están visados os proxectos, non debe haber exactamente a mesma demanda ou a mesma dilixencia no Colexio de xeólogos e neste momento estamos agardando que o estudio xeotécnico sexa visado. Estamos en elo, estes días ese Colexio non funcionaba, estaban na súa quenda de vacacións e agardamos que nos próximos días hábiles, en canto pasen estas festas, nos entreguen o proxecto. Tal é así que o propio arquitecto autor do proxecto na súa felicitación de Nadal puxo unha infografía do proxecto que xa ten elaborado, orgulloso que se sente de el, pero temos ese atranco burocrático que temos que resolver pero que depende de terceiros.

Respecto da pregunta formulada polo señor Rey López respecto dun galpón en Leboráns, voulle dicir que como é lóxico non sei agora mesmo, non podería facer de memoria unha estatística co número de decretos de paralización que asino cada mes pero pode haber meses, en que asine seis ou sete ou oito decretos de paralización. Polo tanto, resúltame moi difícil acordarme de todos eles e de todos os detalles, pero tamén anticipolle xa unha cuestión, vostede como concelleiro que é desta Corporación ten dende este momento a miña total e plena autorización para acudir ao departamento de Urbanismo e ver o expediente en toda a extensión. Estou convencido de que non vai atopar nada ilegal, nada infundado, estas cousas a veces cando temos información delas así de xeito indirecto, é fácil que haxa cousas que nos alarmen un pouco. Seguro que na mesma observación do expediente no seu conxunto, esas mesmas dúbidas quedarán esclarecidas. ¿O galpón é de 25, de 40 ou de 70 metros? Pois evidentemente se pasaba de 40 m<sup>2</sup> ten que ter proxecto técnico, porque esa é a norma deste Concello, o cal me fai indicar que ou hai alí un proxecto técnico acompañando ao expediente, cousa que tamén é posible ou o galpón ten menos de 40 m<sup>2</sup>, pero míreo vostede, eu tamén o vou mirar porque me sementa a min a dúbida.

En calquera caso, se despois dunha paralización lle concedemos unha licenza é porque ten todos os informes técnicos e xurídicos favorables, porque neste Concello, na etapa na que eu son alcalde, garántolle que nin unha sola licenza, nin unha sola, se concedeu co informe negativo técnico ou xurídico, ningunha, polo tanto esa non vai a ser unha

excepción. Probablemente traerían máis documentación, esa licenza ten que ter informe técnico e informe xurídico favorable. No proceso pode haber de todo, poderíalle contar eu aquí un montón de asuntos nos que temos intervido e mesmo houbo algún cambio durante a tramitación, entre outras cousas este debe ter, deduzo estando en Leboráns, informe de Patrimonio, porque está ao lado dun ben de interese cultural. En primeiro lugar, ¿como actuamos neste Concello? A Policía Local ten unhas competencias de vixianza urbanística e execútaas nas súas quendas e nas súas rondas, e sen ser dirixidos a ningún sitio eles van observando o que acontece e piden a quen está executando unhas obras a correspondente licenza. Se lla exhiben comprobamos que se corresponde coa realidade e se non lla exhiben, fan ese informe que vostede dicía, mesmo con fotografías, que pasan inmediatamente á Alcaldía pero en paralelo tamén ao departamento de Disciplina Urbanística. Logo, ven como leu vostede aí o informe do aparelador municipal, porque a Policía ten competencia de vixianza, de control, pero non sempre ten o grao de coñecemento técnico e urbanístico como para dictaminar, de modo que o que fan é alertar dunha situación que pode non ser legal e van os técnicos. Leu vostede dous informes, un da Policía e outro do técnico que aseguran que eso non está ben. Como consecuencia, xa sen consultarme a min, emiten un decreto de paralización, e chega á miña mesa para que o asine. Como é lóxico, doulle lectura, miro de que se trata nos antecedentes, vexo que a Policía Local detecta algo anormal, non correcto en principio, vexo que o aparelador municipal ratifica a incorrección desa actuación e o gabinete xurídico de Urbanismo proponme que paralice esa obra. Eu nunca rexeitei ningún decreto de paralización, polo tanto asínoo, devólvo e executase. É moi frecuente nas actas de Xunta de Goberno Local, verao vostede, que damos licenzas que din que, coa concesión da licenza, levántase o decreto de paralización, porque primeiro paralizamos a obra, impedimos que se faga ilegalmente, cando é legalizable o veciño/a inicia un proceso de legalización que remata con licenza e cando non é legalizable iníciase un proceso que remata co derrube da obra ilegalmente executada. Polo tanto son actos moi reglados, non son actos discrecionais. Evidentemente pode darse a circunstancia, non é fácil pero pode, de que nun informe determinado o noso técnico, baseándose na cartografía do Plan Xeral, afirme que esa propiedade é colindante con un camiño público, porque no Plan Xeral pode estar así grafiado. Se logo os propietarios con outro tipo de documentos acreditan que o Plan Xeral está errado se iso queda suficientemente acreditado o Concello ten que rectificar e onde dicía camiño público dirá camiño privado de uso público porque ás veces no Plan Xeral na cartografía hai algún erro, pero en calquera caso dispón vostede de autorización dende este mesmo momento, pídlle á señora secretaria que tome nota e o transmita así ao departamento, para que vostede poda ir e ver o expediente na súa integridade.

Toma a palabra o concelleiro don **Alfonso Rey López** para dicir que o alcalde foi moi correcto na súa explicación, pero que el xa viu todo o que tiña que ver, e os datos están extraídos do expediente. No expediente había dous motivos polos cales se paralizaba a obra e paréceme correctos, unha era o camiño, había que facer retranqueo e non se facía, e o outro era a superficie. Eu entendo que se puido subsanar o do camiño porque o que se dicía como camiño de carro ou camiño peonil pasa a dicirse que é camiño privado, entón non habería que facer o retranqueo, pero a dúbida está en como é posible se hai documentos que din que é camiño de carro e peonil, documentos notariais.

Di o señor **alcalde** que o documento notarial non é un documento infalible, os notarios algúns son máis rigorosos e outros menos. Eu coñecía algún que dicía que con tal de que vostede veña aquí e diga o que queira, eu poño “segundo manifesta”, é vostede responsable do que di. Os documentos hai que analizalos, e para iso temos persoal xurídico no Concello, pódolle comentar que agora mesmo estamos, tamén na parroquia de Agrón, con un conflito entre dous veciños, presentan documentación contraditoria, e os dous non poden ter razón, iso leva consigo un proceso de mirar no Catastro, no Catastro mais antigo, no PXOM, que son as fontes nas que se ten que informar este expediente. A min cónstame que se pon interese en que as cousas se resolvan adecuadamente pero en todo caso son os informes, a opinión técnica e xurídica despois de estudar o caso e de analízalo, por iso a min me costa moito traballo poder rebater a priori calquera das afirmacións porque eu non adiquei tanto tempo a analízalo como

adicarón eles, pero en calquera caso a min tamén me queda a curiosidade, porque son curioso por natureza, de mirar se puido haber algún erro na tramitación do expediente, case seguro que non.

Pide a palabra o señor **Alfonso Rey López** para rematar a súa intervención dicindo que esa cuestión el pode entendela subsanada porque aínda que poña en dúbida a validez dos documentos efectivamente hai un documento asinado por 14 veciños que din que é un camiño privado. Pero o que non se di que se modificase é a superficie, debería haber algo que dixese por que se reduciu a superficie, ou dicir que se derrubou parte. Trátase de comprobar que se cumpriron todas as esixencias.

O señor alcalde outorga a palabra ao concelleiro de Cultura, Deportes e Patrimonio Histórico don **Francisco Villaverde Marcos**, para dar a explicación correspondente no tema do Bertamiráns e da Gala do deporte, e di que dentro das normas das bases que hai de galardóns da Gala do deporte o que fose premiado, no prazo de cinco anos non poderá volver a selo. O Bertamiráns foi premiado hai tres anos, así que aínda que quixeramos premialo incumpiríamos as normas das bases.

Intervén o señor **Emilio Martínez Carballeira** para dar as grazas pola explicación.

Toma a palabra o señor **alcalde** para dicir que as distincións da Gala do deporte nas que él nunca participou na súa concesión, son sustanciadas por unha comisión ampla con participación dos propios clubs.

Intervén don **Francisco Villaverde Marcos** para dicir que hai unha representación de todas as asociacións deportivas que queren acudir, non van todos, normalmente sobre 15, 16 ou 17 están acudindo, e son os que propoñen e os que votan.

Continúa o señor **alcalde** dicindo que é moi probable, case seguro, que o Bertamiráns estivese representado no tribunal de concesión, de modo que os seus dereitos non serían asoballados.

Continúa dicindo que con respecto á pregunta formulada sobre a colaboración coa Universidade de Santiago, tradicionalmente, nos últimos case 8 anos vimos colaborando con diferentes departamentos da Universidade de Santiago, en materia de empregados públicos, laboral, mapa escolar e demografía municipal, mesmo con FEUGA, fundación empresa universidade que nos permite contratar unha serie de colaboracións de licenciados e licenciadas que veñen a traballar ao noso Concello. ¿Canto nos supón isto? Pois teríamos que cuantificalo, pediríamolle ao departamento de Tesouraría ou de Intervención que nos cuantifique, que nos saque os datos contables, os convenios que se subscribiron este ano e por canto diñeiro, non hai inconveniente ningún por darlle esa información, é pública e está nas contas do Concello. O seu pagamento vai polos cauces normais, presentan factura, o departamento correspondente acepta a factura, dánlle o visto e praxe, o concelleiro correspondente ou o alcalde asina a orde de pagamento e vai ao circuíto normal de pago, non temos ningunha queixa especial da Universidade nese sentido, eu mesmo hai poucos días asinei a conformidade dunha factura de asesoramento en materia laboral da propia Universidade. Teño que dicir que o nivel de colaboración é magnífico, que na Universidade hai moi bos profesionais, como non podía ser de outra maneira, e que estamos moi satisfeitos da colaboración que levamos a cabo.

Pide a palabra o señor **Martínez Carballeira** para dicir que realmente non lle contestou á pregunta, e se lle vai a contestar noutro momento.

Contéstalle o señor **alcalde** dicindo: ¿Canto supón? Xa lle dixen que lle imos pedir ao departamento de Tesouraría ou Intervención que digan o volume de negocio coa USC 2006, 2007, 2008 e 2009 e van a saír os datos.

Di o señor **Martínez Carballeira** que a el o que lle interesa é o 2010. Di o señor alcalde que o 2010 está rematando, que non hai problema, que tomen boa nota o señor tesoureiro e a señora interventora para pasarlle ao señor Martínez un atento oficio desta Alcaldía cos datos da colaboración coa Universidade no ano 2010. En todo caso son datos que están na contabilidade oficial do Concello, a miúdo asinados os correspondentes convenios de colaboración ou encargos, como o que fixemos para o mapa escolar do Concello de Ames.

Continúa o señor **alcalde** contestando á pregunta respecto da parcela que está detrás da cafetería Plaza, dicindo que se vai a ver que actuación definitiva se pode facer nesa parcela, que foi unha cesión temporal que xa no seu día foi obxecto de litixio, de intento de recuperación por parte da Inmobiliaria Mahía, levounos a un pleito, que se resolveu afortunadamente a favor do Concello, non recordo se chegara sequera ao seu trámite final ou desistira a empresa.

Continúa dicindo que respecto do plus de festivos da Policía Local non recorda que haxa ningunha orde de que non se abonen. Tanto por horas extras como por ese acordo que firmamos cos funcionarios vimos pagando cantidades bastante importantes durante todo o ano e firmo tamén como responsable da Policía Local practicamente todos os días declaracións de traballos extraordinarios, de festividade e non festividade da Policía Local, non recordo agora mesmo se é que non entrou a tempo, se se confeccionou a nómina e non chegara aínda esa declaración. Eu sei que agora a finais de ano hai partidas orzamentarias en materia de persoal que poden estar esgotadas e que en lugar de cobrarse o 30 de decembro é posible que se cobren o 5 de xaneiro. Non sei de memoria se este cupo está nese grupo, nese caso incorporaríanse inmediatamente ao orzamento vivo correspondente ao ano 2011 e pasarían ao sistema de cobro. Non hai unhas datas exactas para o pagamento, incorpórase na nómina na medida en que o departamento correspondente ten as declaracións completamente dilixenciadas.

Continúa o señor **alcalde** contestando que con respecto ao campamento de Cudillero (Asturias) voulle dicir á señora secretaria xa dende este mesmo momento que como foi un asunto que vostede sacou aquí no Pleno vai a ser de gran satisfacción para min dar conta neste Pleno dese asunto. Polo tanto señora secretaria por favor tome nota que no próximo Pleno ordinario a finais de xaneiro ademais de dar conta dos decretos da Alcaldía como facemos habitualmente, darei conta ao Pleno dos trámites, informes e providencia da Alcaldía respecto das actividades desenvolvidas no campamento de Cudillero. Por tanto, señor Amor, non vai ter vostede ningunha dúbida, imos informar detenidamente. Creo que de forma bastante imprudente vostede sementou cando menos unha nube difuminada enriba de este asunto e por suposto non temos nada que esconder, luz e taquígrafos.

Toma a palabra o señor **Amor Barreiro** para dicir: Alégrome, porque dende o mes de setembro estamos esperando esa información que vostede dixo reiteradamente que ía dar.

Continúa o señor **alcalde** dicindo: Nunca es tarde cuando la dicha es buena. As veces véxoo a vostede coas pinturas de guerra marcadas pola cara. Respecto da miña entrevista co conselleiro de Educación e co secretario xeral da Consellería, creo que foi o luns ás 4.30 da tarde, ou o martes, pero é moi fácil de seguirlle o rastro porque os conselleiros cada vez que se reúnen comigo poñen un énfase enorme en facerse unha foto e na páxina web da Consellería estou seguro de que hai unha foto dos dous encantados e contentos firmando un acordo moi importante para a Consellería. Eu vin alí a fotógrafa, houbo que esperar por ela mais de dez minutos, por certo chegou máis tarde que o conselleiro e que eu mesmo, e esperamos por ela porque se non había foto o conselleiro non quedaba contento e satisfeito e eu que son moi amigo de deixar contentos e satisfeitos a todos os meus interlocutores agardei pacientemente e polo tanto hai constancia pública desa xuntanza. Nesa xuntanza eu plantexei ao conselleiro e ao secretario xeral da Consellería unha magnífica solución para resolver a parcela do novo CEIP do Milladoiro. Eles pedíronme que agardase a mediados de xaneiro para darme unha resposta e por tanto eu institucionalmente vou agardar pacientemente ata o 15 de xaneiro para que me dean unha resposta. Deixei un documento no seu poder, que debe ter 20 ou 25 páxinas con algún planiño, algunha documentación máis, e agora tócalles estudialo. Como é lóxico nunha cousa tan seria e tan responsable como esta un debe tamén deixar que a outra parte analice a documentación. Cando iso proceda, daremos as explicacións correspondentes e mentres tanto a min tócame seguir, como non podería ser doutra maneira, levando a representación institucional deste Concello e como tal tratar de que as cousas saian adiante, porque xa hai bastantes por detrás que intenta que as cousas deste Concello na Xunta non saian para adiante, xa hai quen se



encarga de poñerlle paos á roda da bicicleta e a choriquear no ombro dos conselleiros e conselleiras dicindo por Dios, que veñen aí as municipais, non lle des bazas a este home que nos arrasa, polo tanto eu vou a seguir na mesma liña, vou a seguir cos contactos institucionais coa Consellería competente na materia e vamos a seguir adiante.

Como estamos no día 30 de decembro, non chegamos aínda ao 31, mañá é fin de ano e pasado ano novo, antes de levantar sesión deséxolles a todos e a todas un feliz ano 2011.

E non habendo mais asuntos de que tratar, o señor alcalde presidente deu por rematado o acto e levantou a sesión ás vinte e dúas horas e corenta e cinco minutos do día 30 de decembro de 2010, de todo o que eu como secretaria certifico.

Vº Prace  
O alcalde

A secretaria